



## **VENDIMI MBI PRANUESHËRINË DHE MERITAT**

**Data e miratimit: 29 qershor 2021**

**Lënda nr. 2016-19**

**Dušan Milosavljević**

**kundër**

**EULEX-it**

Paneli për Shqyrtimin e të Drejtave të Njeriut i mbledhur më 29 qershor 2021, ku të pranishëm ishin anëtarët e paraqitur në vijim:

Znj. Anna AUTIO, kryesuese  
Z. Petko PETKOV, anëtar

Ndihmuar nga:  
Z. Ronald Hooghiemstra, zyrtar ligjor

Pas shqyrtimit të ankesës së lartpërmendur, e cila është dorëzuar në pajtim me Veprimin e Përbashkët të Këshillit 2008/124/CFSP të datës 4 shkurt 2008, Konceptin Llogaridhënës të EULEX-it të datës 29 tetor 2009 për themelimin e Panelit për Shqyrtimin e të Drejtave të Njeriut dhe Rregullores së Punës së Panelit, e ndryshuar për herë të fundit më 11 dhjetor 2019.

Pas shqyrtimit përmes mjeteve elektronike, në përputhje me Rregulloren 13(3) të Rregullores së Punës së Panelit, u vendos si në vijim:

### **I. PROCEDURA PARA PANELIT**

1. Ankesa në lidhje me këtë rast është regjistruar më 30 qershor 2016.
2. Përmes letrës së datës 1 korrik 2016, Paneli e informoi Misionin e Bashkimit Evropian për Sundimin e Ligjit, EULEX-i Kosovë ("Misioni") se ky rast është regjistruar në Panel.
3. Më 29 qershor 2017, Paneli kërkoi nga ankuesja informata shtesë në lidhje me ankesën.
4. Më 20 tetor 2017, ankuesi i parashtroj disa dokumente shtesë.
5. Më 8 dhjetor 2017, Paneli dërgoi një deklaratë të fakteve dhe pyetjeve tek shefja e atëhershme e Misionit dhe e ftoi atë për të dhënë përgjigje dhe vërejtje me shkrim ndaj ankesave më së voni deri më 26 janar 2018.

6. Me një letër të datës 19 janar 2019, Misionit iu kërkua të jepte përgjigje për pyetjet deri më 16 shkurt 2019.
7. Përmes një letre të datës 8 prill 2019, Misionit prapë iu kërkua që të jepte përgjigje ndaj pyetjeve sa më shpejtë që të ishte e mundur.
8. Më 18 tetor 2019, ushtruesi i detyrës së ShM-së paraqiti vërejtjet e tij mbi pranueshmërinë e lëndës.
9. Më 21 tetor 2019, letra e ushtruesit të detyrës së ShM-së u paraqit për informacion ankueses, të cilit iu dha kohë deri më 22 nëntor 2019 për të bërë ndonjë parashtrim të mëtejshëm në përgjigje të asaj letre. Ankuesi nuk dha ndonjë përgjigje.
10. Me një letër të datës 18 shtator 2020, Paneli informoi Misionin se, për të shpejtuar procedurat, Paneli kishte për qëllim të merrej me çështjet e pranueshmërisë dhe meritës në të njëjtën kohë në një vendim të vetëm. Për këtë qëllim, Paneli ftoi Misionin të paraqesë parashtrësat e tij për meritë në ato raste kur ai kishte dhënë tashmë komentet e tij mbi pranueshmërinë.
11. Më 11 dhjetor 2020, Misioni paraqiti komente shtesë në lidhje me meritat e ankesës.
12. Më 17 dhjetor 2020, komentet e Misionit për meritat iu përcollën ankuesit, i cili ishte ftuar të paraqesë komentet e tij mbi meritat e lëndës, nëse ka pasur ndonjë, para datës 31 janar 2021.
13. Për shkak të një ndërlikimi të paparashikuar me dërgimin e komunikimeve postare, Paneli vendosi të zgjasë afatin për ankuesin që të paraqesë komente mbi meritat e lëndës. Përmes një letre të datës 11 shkurt 2021, ankuesi u informua se afati ishte zgjatur deri më 19 mars 2021.
14. Asnjë parashtrësë tjetër nuk u mor nga ankuesi.

## **II. PËRBËRJA E PANELIT**

15. Pas dorëheqjes së një prej anëtarëve të tij të përhershëm dhe dorëheqjes së anëtarit të tij, i cili ishte anëtar i stafit të Shtyllës së Monitorimit të Misionit, Paneli do të shqyrtojë këtë lëndë me vetëm dy anëtarë, në përputhje me rregullat 11 dhe 14 të rregullores së punës së Panelit.

## **III. FAKTET**

16. Faktet e lëndës, siç duket nga ankesa, mund të përmbliidhen si më poshtë.
17. Më 2 tetor 1999, babai i ankuesit, Vasilije Milosavljević, donte të raportonte uzurpimin e banesës së tij të re në Mitrovicën veriore. Ai së pari vizitoi zyrat e KFOR-it në Mitrovicën veriore, por ata nuk mund të ndihmonin. Ai pastaj shkoi në anën jugore të lumit Ibër në mënyrë që të bënte një raport në Policinë e UNMIK-ut. Pas kësaj, ai u zhduk.
18. Sipas një dëshmitari, siç raportohet nga nëna e ankuesit, rreth orës 13:00 të asaj pasdite, një njeri që përputhej me përshkrimin e Vasilije Milosavljeviçit u pa afër tregut të jashtëm në Mitrovicën e jugut dhe ai u mor nga njerëz të panjohur, me sa duket nga shqiptar të Kosovës, duke hyrë në një makinë. Nga ai nuk është dëgjuar më që nga atëherë.

19. Më 4 tetor 1999, zhdukja e Vasilije Milosavljeviçit me sa duket u raportua në Policinë e UNMIK-ut. Më 9 tetor 1999, gruaja e Vasilije Milosavljeviçit raportoi zhdukjen e tij te KFOR-i francez në Mitrovicë. Më 26 tetor 1999, ajo raportoi zhdukjen në Njësinë e Hetimeve të Policisë së UNMIK-ut në Mitrovicë. Ajo dha një deklaratë tjetër për të njëjtën njësi policore të UNMIK-ut në prill 2000. Supozohet se zhdukja u raportua në mënyrë të përsëritur në Policinë e UNMIK-ut në shumë raste pas kësaj.
20. Me sa duket, më 26 korrik 2000, Komiteti Ndërkombëtar i Kryqit të Kuq (ICRC) hapi një kërkesë gjurmimi për Vasilije Milosavljeviç-in.
21. Më 10 dhjetor 2001, gruaja e Vasilije Milosavljeviç-it plotësoi një Formular për Identifikimin e Viktimave për ICRC.
22. Me sa duket, më 17 nëntor 2014, KNKK hapi një kërkesë të përtërirë gjurmuese për Vasilije Milosavljeviç-in.
23. Nuk ka pasur asnjë lajm të mëtejshëm në lidhje me babanë e zhdukur të ankuesit që nga atëherë.

#### **IV. ANKESA DHE QËNDRIMI**

24. Ankuesi pretendon se kurrë nuk ka pasur ndonjë hetim në lidhje me zhdukjen e babait të tij.
25. Paneli konsideron që ankesa ka të bëjë me të paktën dy të drejta themelore të veçanta të pasqyruara në dispozitat e mëposhtme: nenin 2 të Konventës Evropiane për Mbrojtjen e të Drejtave të Njeriut dhe Lirive Themelore ("Konventa"), e cila garanton të drejtën themelore të një personi në jetë dhe nën drejtimin e tij procedural, parasheh obligimin për të hetuar raste të vdekjeve të dyshimta; dhe nenin 3 të Konventës që garanton të drejtën e një personi për të mos iu nënshtruar torturave ose trajtimeve çnjerëzore ose poshtëruese ose ndëshkimeve.
26. Për më tepër, ankesa mund të jetë e rëndësishme për të drejtat e paraqitura në nenet 8 dhe 13 të së njëjtës Konventë, të cilat garantojnë, respektivisht, të drejtën për një jetë familjare dhe të drejtën për një zgjidhje efektive për cilindo që të drejtat dhe liritë e paraqitura në Konventë i janë shkelur. Të njëjtat të drejta mbrohen nga një numër traktatesh të tjera ndërkombëtare, duke përfshirë edhe Paktin Ndërkombëtar për të Drejtat Civile dhe Politike. Këto të drejta janë pjesë e një grupi thelbësor të të drejtave themelore të njeriut që u garantohen të gjithëve si çështje e së drejtës zakonore ndërkombëtare.
27. Duke marrë parasysh marrëdhëniet e ngushta familjare midis viktimës kryesore - Vasilije Milosavljeviç - dhe ankuesit - Dušan Milosavljeviç (djali i Vasilije Milosavljeviç-it) - Paneli është i bindur që ankuesi mund të konsiderohet si viktimë dytësore e shkeljeve të pretenduara dhe se, si i tillë, viktimë e mundshme në përputhje me rregullën 25(1) të rregullores së punës së Panelit.

#### **V. PARASHITESAT E PALËVE NË LIDHJE ME PRANUESHMËRINË**

##### **Ankuesi**

28. Siç u përmbodh më lart, ankuesi pretendon se, gjatë ushtrimit të mandatit të tij ekzekutiv, EULEX-i Kosovë do të duhej të kishte hetuar zhdukjen e babait të tij dhe për fat të keq nuk kishte arritur ta bënte këtë duke shkelur të drejtat themelore të tij dhe të babait të tij.

## **Shefi i Misionit ("HoM")**

29. Në parashtrësat e tij, ShM-ja tregon se Misioni u njoftua rreth zhdukjes së Vasilije Milosavljeviç-it, pasi mori nga UNMIK bazën e të dhënave për rastet e regjistruara në Njësinë e Personave të Zhdukur të Policisë UNMIK (NJPZ). Vetëm emri dhe të dhënat themelore u përfshinë në këtë bazë të të dhënave. Prokurorët e EULEX-it dhe Njësia për Hetimin e Krimeve të Luftës të EULEX-it (NJHKL) nuk morën asnjë dokument në lidhje me këtë zhdukje në kornizën e dorëzimit të lëndëve dhe dosjeve të lëndëve nga UNMIK tek EULEX-i në periudhën dhjetor 2008 deri në mars 2009.
30. Në veçanti, ShM-ja vëren se dokumentet ekzistonin duke treguar që ankuesi kishte raportuar zhdukjen e babait të tij te KFOR-i francez dhe tek Njësia Rajonale e Hetimit e Policisë së UNMIK-ut në Mitrovicë gjatë viteve ndërmjet 1999 dhe 2002. Këto dokumente ishin të përfshira në arkivat e Zyrës së UNMIK-ut për Personat e Zhdukur dhe Mjekësi Ligjore (OMPF), e cila u transferua në Institutin e Mjekësisë Ligjore (IFM). Të dy personat e EULEX-it dhe stafi i Kosovës i IFM kanë pasur qasje në këtë arkiv.
31. ShM-ja vëren se, sipas të dhënave në dispozicion të Misionit, as ankuesi e as ndonjë anëtar tjetër i familjes nuk sollli kurrë zhdukjen e babait të ankuesit në vëmendjen e Misionit.
32. Lidhur me regjistrimin dhe kategorizimin e rasteve të dorëzuara nga UNMIK-u tek EULEX-i, Misioni tregon se përveç dosjeve të lëndëve që EULEX-i i mori nga UNMIK-u në 2008-2009, kishte edhe disa baza të dhënash në Microsoft Access që ishin transferuar. Këto përfshinin një për dosjet e policisë "për krime lufte" dhe një tjetër për rastet e "personave të zhdukur" (Njësia e Personave të Zhdukur - Baza e të dhënave të NJPZH-së). Zhdukja e Vasilije Milosavljeviç-it u përmend në këtë bazë të të dhënave, por jo në ish-bazën e të dhënave.
33. ShM-ja vëren më tej se nuk kishte asnjë përfshirje nga ana e EULEX-it në lidhje me zhdukjen e Vasilije Milosavljeviçit, dhe as EULEX-i dhe as IFM-ja nuk morën ndonjë informacion në lidhje me vendndodhjen e mundshme të eshtrave të z. Milosavljeviçit.
34. Lidhur me ankesat specifike kundër EULEX-it, ShM-ja deklaron se ai merr parasysh faktin se Paneli e ftoi EULEX-in të paraqesë vërejtje mbi pranueshmërinë dhe meritat e ankesës vetëm në lidhje me nenet 2 dhe 3 të Konventës, dhe për këtë arsye Kontributi i Misionit do të jetë i kufizuar vetëm në këto dy nene.
35. Në parashtrësat e tij në lidhje me këto dispozita, Misioni vëren praktikën gjyqësore të Gjykatës Evropiane të të Drejtave të Njeriut dhe të Panelit për Shqyrtimin e të Drejtave të Njeriut në raste të ngjashme dhe nuk e konteston pranueshmërinë e kësaj ankese sipas neneve 2 dhe 3 të Konventës Evropiane për të Drejtat e Njeriut.
36. Misioni më tej vëren se ankuesi nuk i referohet ndonjë shkeljeje të veçantë apo shkeljes së të drejtave themelore nga EULEX-i Kosovë. Misioni thekson se është Paneli ai që vlerëson se ankesa ngritë çështje sipas neneve 2 dhe 3 të Konventës, e jo ankuesi. Misioni vëren se ankuesi nuk paraqet ndonjë argument për shqyrtim nga Paneli.

## **VI. VLERSIMI I PANELIT LIDHUR ME PRANUESHMRINË E LËNDËS**

*Mandati i Panelit (Rregulli 25, paragrafi 1, i rregullores së punës) dhe kufizimet e qenësishme të vendosura për Misionin në lidhje me mbrojtjen e të drejtave të njeriut.*

37. Siç u përmend më lart, ShM-ja nuk e konteston pranueshmërinë e kësaj lënde.
38. Pasi të ketë shqyrtuar kërkesat përkatëse të pranueshmërisë, Paneli është i bindur që lënda është vërtetë e pranueshme.

## VII. PARASHTRERAT E PALËVE NË LIDHJE ME MERITAT E LËNDËS

### Ankuesi

39. Siç u përmend më lart, ankuesi pretendon që, gjatë ushtrimit të mandatit të tij ekzekutiv, EULEX-i Kosovë do të duhej të kishte hetuar zhdukjen e babait të tij dhe për fat të keq dështoi ta bëjë këtë duke shkëlur të drejtat themelore të tij dhe të babait të tij. Paneli ka vendosur më sipër që ankesa këtu duhet të merret në konsideratë në dritën e neneve 2 (pjesë procedurale), 3, 8 dhe 13 të Konventës Evropiane të të Drejtave të Njeriut.

### Shefi i Misionit

40. Me një letër të 11 dhjetorit 2020, shefi i Misionit iu përgjigj ftesës për të dhënë vërejtje shtesë mbi meritat e lëndës, përtej asaj që u tha në vërejtjet e tij mbi pranueshmërinë.
41. Misioni iu referua parashtrimeve të tij të mëparshme mbi pranueshmërinë. Në ato parashtrime, Misioni bën disa komente të përgjithshme në lidhje me disa nga sfidat praktike që lidhen me hetimin e këtij lloji të lëndëve dhe pranon që menaxhimi i dosjeve që mori nga UNMIK-u kishte qenë veçanërisht sfidues.
42. Misioni sqaron se nën mandatin e tij aktual, EULEX-i nuk është i autorizuar të zbulojë informacione mbi hetimet në vazhdim që ka marrë gjatë aktivitetëve të tij të monitorimit. Misioni parashtron se:

“Prandaj, kur fton ankuesit të kontaktojnë institucionet kompetente, Misioni thjesht po i referon ata tek autoritetet që janë sipas ligjit, kompetent dhe të autorizuar për t’u lëshuar informacion atyre në lidhje me ndonjë hap hetimor që mund të kenë ndërmarrë që nga fundi i mandatit ekzekutiv të EULEX-it në sistemin e drejtësisë penale në qershor të vitit 2018”.

43. Në lidhje me obligimet e tij ndaj të drejtave të njeriut, Misioni rikujton se:

“Obligimi procedural sipas nenit 2 të [Konventës Evropiane për të Drejtat e Njeriut], është obligim *“i mjeteve “dhe” jo i rezultatiit*”. Thelbësore në vlerësimin e zbatimit të tij është se “autoritetet kanë bërë gjithçka që në mënyrë të arsyeshme mund të pritej prej tyre në rrethanat e rastit”. (Shih, për shembull, Gjykata Evropiane e të Drejtave të Njeriut (GJEDNJ) *Trivkanović kundër Kroacisë*, nr. 12986/13, Aktgjykimi i 6 korrikut 2017, par. 78; *Borojević dhe të tjerët k. Kroacisë*, nr. 70273/11, Aktgjykimi i 4 prillit 2017, par. 57; *Nježić dhe Štimac k. Kroacisë*, nr. 29823/13, Aktgjykimi i 9 prillit 2015, par. 69”).

44. Për më tepër, Misioni rikujton se:

*“Natyra dhe shkalla e shqyrtimit duhet të vlerësohet në bazë të të gjitha fakteve relevante dhe në lidhje me realitetet praktike të punës hetimore”*. (Shih, për shembull, GJEDNJ *Cindrić dhe Bešlić kundër Kroacisë*, nr. 72152/13, Aktgjykimi i datës 6 shtator 2016, par. 69; *Zdjelar dhe të tjerët k. Kroacisë*, nr. 80960/12, Aktgjykimi i datës 6 korrik 2017, par. 83; *Velcea dhe Mazare kundër Rumanisë*, nr. 64301/01, Aktgjykimi i datës

1 dhjetor 2009, par. 105; dhe *Armani da Silva kundër Mbretërisë së Bashkuar*, nr. 5878/08 5878/08, Aktgjykim i datës 30 mars 2016, par. 234”.

45. Misioni gjithashtu parashtroi se:

“Në bazë të jurisprudencës së mësipërme, Misioni dëshiron të theksojë se një vlerësim i asaj që ishte e arsyeshme nga ana e EULEX-it në lidhje me ankesat e mësipërme, nënkupton marrjen në konsideratë si 'fakt të rëndësishëm' se këto zhdukje ose vrasje janë jo raste të izoluara, por të materializuara në kontekstin e mijëra zhdukjeve dhe vrasjeve siç dokumentohen në 'Librin e Kujtimit të Kosovës' të Fondit për të Drejtën Humanitare në Kosovë. Në të vërtetë, më shumë se 13,000 individë, nga të cilët 10,000 civilë, u vranë ose u zhdukën në periudhën 1998-2000, shumë prej tyre si rezultat i veprave të tmerrshme penale.

46. Prandaj, Misioni pretendon se:

“*Realitetet praktike të punës hetimore* në kontekstin e krimeve në shkallë të gjerë të lidhura me një situatë konflikti si ajo në Kosovë në vitet 1998-2000, natyrisht nënkuptojnë se këto nuk mund të hetohen të gjitha në të njëjtën kohë nga autoritetet kompetente dhe gjithashtu se rastet që mund të mbyllen për shkak të mungesës së informatave nuk do të rihapen në mënyrë rutinore nëse nuk paraqiten informacione të reja. Prandaj, standardet e hetimit efektiv të vendosura nga Gjykata Evropiane e të Drejtave të Njeriut nuk mund të zbatohen për këtë lloj çështjesh në të njëjtën mënyrë si me rastet që nuk u materializuan në një kontekst të krimeve në shkallë të gjerë që përfshijnë mijëra viktima”.

47. Misioni gjithashtu pranon që:

“menaxhimi i dosjeve të trashëguara nga UNMIK-u ishte një sfidë dhe se [Misioni] nuk ishte në gjendje të korrigjojë shumë dallime dhe përsëritje. Ai gjithashtu pranon që njësitë e tij policore dhe prokuroriale duhet të kishin siguruar komunikim më të mirë me viktimat dhe të afërmit e viktimave dhe gjithashtu me publikun e gjerë. Sidoqoftë, ai pohon se do të kishte qenë thjesht joproporcionale të pritej që Misioni të mund të hetojë të gjitha vrasjet, vdekjet e dyshimta dhe zhdukjet dhe të rihapë rastet që tashmë kishin përfunduar nga autoritetet e UNMIK-ut”.

48. Misioni nuk konteston që ankuesi ka të drejtë të dijë se çfarë i ka ndodhur babait të tij. Misioni është gjithashtu në dijeni se vuajtjet e tij dhe të të afërmeve të tjerë të Vasilije Milosavljeviçit duhet të jenë të padurueshme dhe shpreh keqardhje të thellë për këtë.

49. Sidoqoftë, Misioni gjykon se:

“një vlerësim i sjelljes së EULEX-it nën kreun procedural të nenit 2 dhe nenit 3 të Konventës në lidhje me këtë zhdukje specifike nuk mund të shpërfillë madhësinë e sfidës së paraqitur nga numri shumë i lartë i krimeve, si dhe konteksti dhe rrethanat në të cilat Misioni u thirr për të zbatuar mandatin e tij. Së pari, duhet theksuar përsëri që dokumentet e UNMIK-ut dhe KFOR-it që kanë të bëjnë me zhdukjen e Vasilije Milosavljeviçit nuk i janë dorëzuar EULEX-it nga UNMIK-ut. Misioni nuk është në dijeni se ku mund të jenë origjinalet e këtyre dokumenteve dhe është në dijeni vetëm se kopjet e disa dokumenteve të UNMIK-ut dhe KFOR-it janë në arkivat e IFM siç shpjegohet më lart”.

50. Prandaj, Misioni këmbëngul që në rastin aktual, dhe duke marrë parasysh pengesat themelore me të cilat u prezantua, nuk beson se të drejtat e ankuesit ishin shkelur.

## Parashtrimet në përgjigje

51. Më 17 dhjetor 2020, parashtrësas e Misionit për meritat e lëndës iu përcollën ankuesit, i cili ishte ftuar të paraqesë komentet e tij mbi meritat e lëndës, nëse ka, para 31 janarit 2021.
52. Për shkak të një ndërlíkimi të paparashkuar me dërgimin e komunikimeve postare, më 11 shkurt 2021, Paneli vendosi të zgjasë afatin për ankuesin që të paraqesë komente mbi meritat e lëndës deri më 19 mars 2021.
53. Asnjë parashtrësë tjetër nuk u mor.

## VIII. VLERSIMI I PANELIT NË LIDHJE ME MERITAT E LËNDËS

### Konsiderata të përgjithshme

54. Misionit iu kërkua të përmbushë përgjegjësitë e tij ekzekutive në një mënyrë që përputhet me standardet përkatëse të të drejtave të njeriut. Kjo nënkuptonte, ndër të tjera, se do të hetonte rastet brenda kompetencës së vet juridiksionale që përfshinin shkeljen e të drejtave të garantuara sipas neneve 2 dhe 3 të Konventës Evropiane të të Drejtave të Njeriut. Lidhur me standardet përkatëse ligjore të zbatueshme, shih: PShDNj, Shënim i Praktikës Gjyqësore mbi Detyrimin për Hetimin e Pretendimeve të Shkeljeve të të Drejtave, fq. 3-5 (dhe praktikën e cituar gjyqësore); dhe *Sadiku-Syla kundër EULEX-it*, 2014-34, Vendimi dhe Gjetjet, 19 tetor 2016, par. 36; *D.W., E.V., F.U., G.T., Zlata Veselinović, H.S., I.R. kundër EULEX-it*, 2014-11 deri 2014-17, Vendimi mbi Pranueshmërinë, 30 shtator 2015, par. 88; *Sadiku-Syla kundër EULEX-it*, 2014-34, Vendimi mbi Pranueshmërinë, 29 shtator 2015, par. 58. Shih gjithashtu GjEDNj: *Nachova dhe të tjerët kundër Bullgarisë*, Aplikacioni nr. 43577/98 dhe 43579/98, Aktgjykimi i datës 6 korrik 2005, par. 110; *Hugh Jordan kundër Mbretërisë së Bashkuar*, Aplikacioni nr. 24746/94, Aktgjykimi i datës 4 maj 2001, par. 105; *McCann dhe të tjerët kundër Mbretërisë së Bashkuar*, Aktgjykimi i datës 27 shtator 1995, Seria A nr. 324, par. 161; *Assenov dhe të tjerët k. Bullgarisë*, Aktgjykimi i datës 28 tetorit 1998, Raportet e Vendimeve dhe Vendimet 1998-VIII, paragrafi. 102.
55. Ai gjithashtu kërkoi që Misioni t'i ofrojë vlerësime të afërmve të të zhdukurve në mënyrë adekuate për përpjekjet e tij për të hetuar këtë lëndë. HPSHDNj, Shënim i lëndëve gjyqësore mbi detyrën për të hetuar pretendimet e shkeljeve të të drejtave, fq. 28-30 (dhe praktikën gjyqësore të cituar); dhe *L.O. kundër EULEX-it*, 2014-32, Vendimi dhe Gjetjet, 11 nëntor 2015, paragrafët 61-63; *U.F. kundër EULEX-it*, 2016-12, Vendimi dhe Gjetjet, 12 Shkurt 2020, paragrafi 97; *Milijana Avramović kundër EULEX-it*, Vendimi dhe Gjetjet, Lënda nr. 2016-17, 4 qershor 2019, par. 55; *S.H. kundër EULEX-it*, Vendimi dhe Gjetjet, lënda nr. 2016-28, 11 shtator 2019, par. 66; *Desanka dhe Zoran Stanisić kundër EULEX-it*, 2012-22, 11 nëntor 2015, par. 66; shih gjithashtu *Ahmet Özkan dhe të tjerët kundër Turqisë*, Aplikacioni nr. 21689/93, Aktgjykimi i GjEDNj-së i datës 6 prill 2004, paragrafët. 311-314; *Isayeva k. Rusisë*, Aplikacioni nr. 57950/00, Aktgjykimi i GjEDNj-së i datës 24 shkurtit 2005 paragrafët. 211-214; *Al-Skeini dhe të tjerët kundër Mbretërisë së Bashkuar*, Aplikacioni nr. 55721/07, Aktgjykimi i GjEDNj-së i datës 7 korrik 2011, par. 167).
56. Lënda aktuale, si dhe rastet e tjera të zhdukjes me force/personave të zhdukur, hyrë brenda fushës së atyre kompetencave dhe përgjegjësi.
57. Misioni ngritë një numër argumentesh në përpjekje për të shpjeguar dështimin e tij për të hetuar lëndën këtu (dhe raste të tjera të ngjashme) dhe për të mbajtur të informuar siç duhet të afërmit e të zhdukurve në këtë rast.

58. Paneli thekson që shumë dhe shumica e atyre argumenteve tashmë janë ngritur dhe refuzuar në raste të mëparshme të të njëjtit lloj. Prandaj, Paneli do të kufizojë konsideratat e tij për ato në atë që është rreptësisht e nevojshme për zgjidhjen e lëndës në fjalë.

### **Sfidat që lidhen me hetimin e personave të zhdukur/rastet e zhdukjeve me forcë**

59. Shefi i Misionit sugjeron që sjellja e Misionit në lidhje me rastet individuale duhet të konsiderohet në bazë të sfidës së përgjithshme, e cila paraqet hetimin e të gjitha rasteve të personave të zhdukur të përfaqësuar për Misionin. Paneli ndan këtë pikëpamje vetëm deri në një pikë.
60. Është e saktë, siç Paneli e ka pranuar në mënyrë të përsëritur, se detyra me të cilën përballej Misioni ishte shqetësuese. Në fillim të mandatit të tij, kishte qindra raste që përfshinin shkelje serioze të të drejtave të njeriut për Misionin për të hetuar. Gjithashtu është e saktë që burimet e tij - në ekspertizë, financa dhe personel - ishin të kufizuara. Për më tepër, këto hetime të vështira do të kryheshin vetëm me mbështetje të kufizuar nga autoritetet vendore dhe në një situatë pas konfliktit që do ta bënte një situatë të vështirë edhe më sfiduese. Për më tepër, Misioni trashëgoi të dhëna nga UNMIK-u që ishin mbajtur dhe organizuar dobët. Kjo kërkoi që Misioni të kryejë rishikimin e tij, të përsëritur, të atyre shënimeve. Lidhur me këto vështirësi, shih gjithashtu: *U.F. kundër EULEX-it*, 2016-12, Vendimi dhe Gjetjet, 12 shkurt 2020, paragrafi 60; *L.O. kundër EULEX-it*, 2014-32, 11 nëntor 2015, par. 43-45; *A, B, C, D kundër EULEX-it*, 2012-09 deri 2012-12, 20 qershor 2013, paragrafi 50; *K deri në T kundër EULEX-it*, 2013-05 deri 2013-14, 21 prill 2015, par. 53; *Sadiku-Syla kundër EULEX-it*, 2014-34, Vendimi mbi Pranueshmërinë, 29 shtator 2015, paragrafët. 35-37; *D.W., E.V., F.U., G.T., Zlata Veselinović, H.S., I.R. kundër EULEX-it*, 2014-11 deri 2014-17, Vendimi mbi Pranueshmërinë, 30 shtator 2015, paragrafët. 72-74; shih gjithashtu Vendimin e Panelit Këshillëdhënës për të Drejtat e Njeriut të UNMIK (PKDNj) në lëndët nr. 248/09, 250/09 dhe 251/09, 25 prill 2013, par. 35 dhe paragrafët 70-71.
61. Argumentimi i paraqitur në parashtrimin nga ana e shefit të Misionit duke treguar kufizimet e tij nuk ka të bëjë me këtë rast specifik. Në vend të kësaj, ai reflekton mangësi sistematike të Misionit, duke përfshirë këto: mungesë të përgjithshme të planifikimit adekuat për hetimet dhe ndjekjet penale; mungesë të politikës së prioritizimit të rasteve; mungesë të përqendrimit në rastet që përfshijnë shkelje serioze të të drejtave të njeriut; mungesë të hetimeve të shpejta dhe efektive; dështim të përgjithshëm për të informuar të afërmit e personave të zhdukur; asnjë politikë të qartë për rastet e zhdukjeve me forcë dhe asnjë prioritizim të tyre; numër të ulët të rasteve të personave të zhdukur të "zgjidhur"; mbështetje të paarsyeshme në regjistrat dhe përcaktimin nga ana e UNMIK-ut (shih, p.sh. *Q.J. kundër EULEX-it*, 2016-23, Vendimi dhe Gjetjet, 11 dhjetor 2020, paragrafët 45-47; *Vesko Kandić kundër EULEX-it*, 2016-24, Vendimi i Pranueshmërisë dhe Vendimi dhe Gjetjet, 11 dhjetor 2020, paragrafët 80-84); Praktikrat e diskutueshme nga personeli i prokurorisë (Shih p.sh. *W. kundër EULEX-it*, 2011-07, Vendimi dhe Gjetjet, 10 prill 2013, paragrafët 34-35; *F. dhe të tjerët kundër EULEX-it*, 2011-27, Vendimi dhe Gjetjet, 5 dhjetor 2017, paragrafët 60-63); veprimet e kryera pa bazë të qartë ligjore (Shih p.sh. *W. kundër EULEX-it*, 2011-07, Vendimi dhe Gjetjet, 10 prill 2013, paragrafët 41-43; *G.T. kundër EULEX-it*, 2019-01, Vendimi dhe Gjetjet, 11 dhjetor 2020, paragrafi 70); dështimi për të kërkuar shënime përkatëse nga burimet e mundshme të informacionit (p.sh., ICRC; autoritetet serbe; OSBE). Këta faktorë, dhe të tjerët, janë të gjithë të dukshëm nga rastet që kanë dalë para Panelit.
62. Faktorët e mësipërm nuk janë pasojat e sfidave që lidhen me mandatin e Misionit ose me mungesën e burimeve. Ato janë pasojë e planifikimit të dobët, menaxhim joadekuat operacional të hetimeve dhe ndjekjeve penale, mungesë e politikës së qartë të prioritizimit

të rasteve, mosvendosja e një sistemi komunikimi me familjarët e personave të zhdukur dhe mosarritje e një politike të qartë hetimore dhe prokuroriale në lidhje me të këto lloje të rasteve. Ata gjithashtu demonstrojnë një paaftësi nga ana e Misionit që të sigurojnë që planifikimi dhe zbatimi i aktiviteteve të tij vazhdimisht të marrë parasysh obligimet e Misionit ndaj të drejtave të njeriut.

63. Paneli dëshiron të theksojë kalimthi se Misioni e kuptoi tashmë gjatë procesit të transferimit se kushtet e dosjeve të transferuara ishin larg nga të qenurit të përshtatshme. Prandaj, Misioni duhej të ishte paralajmëruar se duhet pasur nevojë të afrohet dhe të mbështet te ato shënime me kujdes. Njohuritë e Misionit për sfidat e lidhura me dosjet duhet ta kishin paralajmëruar atë për nevojën për të siguruar që aftësia e tij për të përmbushur obligimet e veta nuk ishte ndikuar negativisht nga ato të dhëna. Si mision ndërkombëtar i sapo themeluar, EULEX-i Kosovë pritej të vepronte me kujdesin e duhur dhe në përputhje me obligimet e tij ndaj të drejtave të njeriut. Për të kuptuar shkallën e detyrave të tij në mjedisin pas konfliktit ishte e nevojshme të njëjhej me përmbajtjen aktuale të të gjitha dosjeve të lëndëve në mënyrë që të drejtat e atyre që ishin të përfshirë të ruheshin. Kjo duket se nuk ka ndodhur në çdo rast në dëm të viktimave të shkeljeve të të drejtave të njeriut siç është ankuesi.
64. Bazuar në sa më sipër, Paneli do të ftojë shefin e Misionit të kryejë një rishikim të plotë të të dhënave hetimore dhe prokuroriale të Misionit gjatë kohëzgjatjes së tij për të pasur një kuptim të qartë, të plotë dhe të informuar të shkaqeve dhe rrethanave të paaftësisë së tij për të përmbushur këtë pjesë të mandatit të vet në mënyrë efektive dhe në një mënyrë në përputhje me obligimet e veta ndaj të drejtave të njeriut. Kjo duhet të ndihmojë shefin e Misionit të adresojë trashëgiminë e jashtëzakonshme të të drejtave të njeriut të këtyre dështimeve me qëllim që të sigurojë që Misioni të jetë në gjendje të rregullojë ato shkelje të të drejtave të njeriut që ka kryer gjatë ekzistencës së tij.

#### **Mungesa e provave të një hetimi para-ekzistues**

65. Në parashtrimet e tij në lidhje me pranueshmërinë e kësaj ankese (shih, sipër, par. 32), Misioni pranon që:

“Nuk kishte asnjë përfshirje nga ana e EULEX-it në lidhje me zhdukjen e Vasilije Milosavljeviç-it”.
66. Misioni vëren se kishte disa baza të dhënash në Microsoft Access që ishin dorëzuar nga UNMIK-u tek Misioni. Këto përfshinin një për dosjet e policisë "për krime lufte" dhe një tjetër për rastet e "personave të zhdukur". Rasti i Vasilije Milosavljeviç u përmend në bazën e të dhënave për rastet e "personave të zhdukur", por jo në bazën e të dhënave të dosjet e policisë për "krime lufte".
67. Misioni nuk jep asnjë shpjegim të mëtejshëm se pse nuk u krye asnjë hetim mbi zhdukjen e Vasilije Milosavljeviç përveç të vërejtë se nuk u mor asnjë informacion në lidhje me vendndodhjen e mundshme të mbetjeve të tij (shih sipër par. 32).
68. Këto parashtrime nuk arrijnë të bindin për arsyet e mëposhtme. Misioni nuk mund të përdorë dështimin e tij për të arsyetuar mungesën e informacionit. Informacioni lind nga hetimi, jo e kundërta. Prandaj ishte përgjegjësia e Misionit të provonte dhe të merrte një informacion të tillë. Ndërsa obligimet e tij në atë drejtim ishin një nga mjetet e jo rezultat, nga të dhënat shihet se ai as nuk u përpoq të kërkonte dhe të merrte informacion përveç asaj që trashëgoi nga UNMIK-u.
69. Obligimet e Misionit ndaj drejtave të njeriut që rrjedhin nga nenet 2 dhe 3 të Konventës për të hetuar këto lloje të rasteve duhet të plotësohen, pavarësisht nga cilësia e provave.

Do të ishte absurde nëse një autoritet mund të heqë veten nga obligimet e tij hetimore për shkak të mungesës së informacionit para se të fillojë të hetojë. Marrja e informacionit është pika kryesore e një hetimi. Nëse, pas një përpjekje efektive dhe të arsyeshme për të hetuar në përpjesëtim me rëndësinë e të drejtave në fjalë, nuk mund të merret asnjë informacion ose i pamjaftueshëm, autoritetet nuk mund të mbajnë përgjegjësi të gjejnë më shumë. Sidoqoftë, këtu nuk ndodh kështu. Misioni as nuk u përpoq as nuk filloi të hetojë. Prandaj nuk mund të përdorë mungesën e informacionit (adekuat ose të mjaftueshëm) si bazë për dështimin e tij për të filluar një hetim.

70. Arsyetimi i paraqitur në parashtresat e ShM-së dëshmon se Misioni nuk e kuptonte faktin se për sa kohë që dosjet e lëndës të transferuara nga UNMIK-u mbeteshin në posedim të EULEX-it, Misionit iu morën ato raste, kështu që ishte kompetent dhe përgjegjës për të filluar apo vazhduar veprimtarinë hetimore, deri në momentin kur autoritetet e Kosovës u informuan zyrtarisht për ato raste dhe dosjet e transferuara ose derisa të kishte përbushur të gjitha obligimet e veta në lidhje me atë rast.
71. Paneli nuk mund ta pranojë këtë si arsyetim për dështimin e Misionit për të vepruar. Së pari, siç e ka nënvizuar Misioni në mënyrë të përsëritur, ai e dinte që të dhënat e UNMIK-ut ishin jo të besueshme. Kjo duhet të kishte ngritur shqetësime në lidhje me cilësinë e punës dhe zellit të dhënë ndaj përgjegjësive të tij hetimore. Edhe nëse jo, përgjegjësitë e Misionit ndaj të drejtave të njeriut ishin të vetat. Ato nuk mund t'u delegohen palëve të treta, përfshirë UNMIK-un. Prandaj ishte përgjegjësia e Misionit të rishikonte ato regjistra (siç bëri) në mënyrë që të formonte mendimin e vet për rrjedhën e veprimit që do të ndërmerrej në lidhje me secilin rast individual. Mungesa e dukshme e një hetimi nga UNMIK-u nuk kishte asnjë ndikim ligjor në përgjegjësitë të Misionit.
72. Paneli gjithashtu vëren në këtë kontekst që Misioni ka deklaruar në lidhje me disa raste të zhdukjes me forcë se rrethanat e detyruan atë të jepte përparësi për kategori të caktuara të lëndëve dhe se nuk mund të pritej të hetonte të gjitha rastet e tilla. Si rezultat, dhe për të vlerësuar meritat e këtyre pretendimeve, në kontekstin e *Miomir Krivokapic kundër EULEX-it*, lënda nr. 2016-13, Vendimi dhe Gjetjet, 12 shkurt 2020, Paneli kërkoi nga Misioni të sigurojë informacion në lidhje me numrin e rasteve të zhdukjes me forcë 'që ishin hetuar dhe/ose ndjekur penalisht nga Misioni gjatë ekzistencës së tij. Pasi nuk arriti t'i përgjigjej kërkesës së Panelit për atë informacion, Misioni përsëri u kujtoi nga Paneli për kërkesën e tij për të marrë atë informacion. Shih *Miomir Krivokapic kundër EULEX-it*, lënda nr. 2016-13, Vendimi mbi Zbatimin e Rekomandimeve të Panelit, 12 shkurt 2021. Në kohën e këtij Vendimi, informacioni i kërkuar nuk është marrë ende. Paneli vëren në lidhje me këtë se nuk ka asnjë provë para tij që Misioni i trajtoi rastet e 'zhdukjes me forcë' me përparësi ose që rastet para Panelit të jenë të pazakonta që i shmangen vëmendjes së Misionit. Në vend të kësaj, do të duket se ato pasqyrojnë dështimin e Misionit për të trajtuar raste të tilla me përparësi dhe për të investuar kohë dhe burime të përshtatshme në përpjekjen për t'i zgjidhur ato.
73. Prandaj, një shpjegim i tillë nuk jep arsyetim për dështimin e Misionit për të hetuar këtë rast dhe për të mbajtur të informuar familjarët e të zhdukurve siç duhet.

#### **Njoftim i të afërmeve të personit të zhdukur**

74. Misioni nuk ka paraqitur ndonjë shpjegim të menjëhershëm për dështimin e tij për të informuar të afërmit e të zhdukurve në këtë rast për veprimet e tij ose vendimin për të mos hetuar këtë rast.
75. Në këtë kontekst, cilësia ose mjaftueshmëria e supozuar joadekuante e informacionit nuk kishte asnjë ndikim në obligimin e Misionit për të informuar të afërmit. Me ose pa një informacion të tillë, u kërkua të informohen të afërmit për personat e zhdukur për veprimet

dhe përpjekjet e tyre. Ai dështoi ta bëjë këtë dhe nuk ka dhënë arsye të arsyeshme për atë dështim.

76. Bazuar në sa më sipër, Paneli konstaton se Misioni dështoi të përmbushë obligimin e tij sipas nenit 2 (pjesë procedurale) dhe nenit 3 të Konventës për të mbajtur të afërmit e ngushtë të Vasilije Milosvljeviç të informuar në mënyrë të përshtatshme për rrjedhën e veprimit të ndërmarrë për të hetuar zhdukjen.

#### **Mandati i vazhduar ekzekutiv**

77. Misioni ka përsëritur një parashtrësë që ai e kishte bërë në rastet e mëparshme se ai është i gatshëm të ndihmojë nëse informacionet e reja në lidhje me të afërmin e ankuesit bëhen të disponueshme.
78. Paneli ka shprehur më parë parashtrësën e tij në lidhje me parashtrësat e tilla, në veçanti, pasi kjo mund t'i japë ankuesit përshtypjen se Misioni është ende i përfshirë në hetimin e kësaj lënde, ndërsa nuk është kështu. Një deklaratë e tillë është për më tepër në kundërshtim me qasjen e Misionit ndërsa insiston që ai mund të mos bëjë asgjë në ato raste për shkak të mungesës së mandatit ekzekutiv dhe respektimit të pavarësisë së autoriteteve të Kosovës. Për më tepër, siç është vërejtur tashmë, Misioni e di se pa një hetim, informacioni i tillë nuk ka gjasa të bëhet i disponueshëm. Prandaj është e nevojshme që Misioni të shtojë përmbajtje në fjalët e tij. Shih *Q.J. kundër EULEX-it*, 2016-23, Vendimi dhe Gjetjet, 11 dhjetor 2020, paragrafët. 60-64.

#### **Përfundime dhe gjetje**

79. Bazuar në sa më sipër, Paneli konstaton se Misioni ka shkelur të drejtat e ankuesit sipas nenit 2 (pjesë procedurale) dhe 3 të Konventës duke dështuar të hetojë zhdukjen e të afërmit të tij dhe duke dështuar t'ia sigurojë atij dhe të afërmit të tjerë të ngushtë ndonjë informacion në lidhje me këtë rast. Duke marrë parasysh seriozitetin e të drejtave në fjalë, peshën e dështimit të Misionit dhe kohëzgjatjen e kohës në fjalë, shkelja duhet të konsiderohet si veçanërisht e rëndë. Shkelja është gjithashtu duke vazhduar.
80. Prandaj, shefi i Misionit ftohet të marrë hapa dhe masa që janë në përpjesëtim me këtë fakt.
81. Bazuar në ato gjetje, Paneli e konsideron të panevojshme të bëjë gjetje shtesë në lidhje me nenet 8 dhe 13 të Konventës. Sidoqoftë, është mjaft e dukshme që sjellja e Misionit ka pasur një efekt negativ në të drejtat e ankuesit siç mbrohen nga ato dispozita. Në vlerësimin e tij se cilat masa ose hapa duhet të ndërmerren për të korrigjuar shkeljet e regjistruara në këtë vendim, shefi i Misionit ftohet të japë llogari për këtë fakt.
82. Në këtë kontekst, Paneli fton Misionin t'i kushtojë vëmendje të duhur domosdoshmërisë dhe efektivitetit të ngritjes në mënyrë të përsëritur të të njëjtave argumente dhe pika, të cilat tashmë janë adresuar në rastet e mëparshme. Paneli fton Misionin t'i ankorojë parashtrësat e tij të ardhshme në një analizë të aktiviteteve të Misionit nga perspektiva e obligimeve të tij ndaj të drejtave të njeriut.
83. Paneli gjithashtu do të ftojë shefin e Misionit të marrë parasysh nevojën që Misioni të kryejë një rishikim transparent dhe efektiv të aktiviteteve dhe trashëgimisë së tij - në veçanti, nga këndvështrimi i obligimeve të tij ndaj të drejtave të njeriut - në mënyrë që të mësohen nga përvoja e Misionit për përpjekje të tilla në të ardhmen.

## PËR KËTO ARSYE, PANELI NJËZËRI

**GJEN** se ankesa është e pranueshme në përputhje me nenet 2 (pjesë procedurale), 3, 8 dhe 13 të Konventës Evropiane të të Drejtave të Njeriut;

**GJEN** se Misioni i ka shkelur të drejtat e ankuesit të garantuara me nenin 2 (pjesë procedurale) dhe me nenin 3 të Konventës;

**GJEN MË TUTJE SE** shkeljet janë serioze dhe të vazhdueshme dhe se, për këtë arsye, ato kërkojnë miratimin e masave korrigjuese në përpjesëtim me to;

**THIRR** shefin e Misionit të zbatojë masa përmirësuese në përpjesëtim me peshën e shkeljeve të përfshira;

**KONSTATON** se nuk ka nevojë të bëjë gjetje mbi meritat në lidhje me nenet 8 dhe 13 të Konventës;

**Fton SHEFIN E MISIONIT** për të shqyrtuar interpretimin e dhënë aktualisht për natyrën dhe fushën e obligimeve të Misionit ndaj të drejtave të njeriut dhe për të marrë në konsideratë sa vijon:

1. Paneli fton shefin e Misionit të konsiderojë zyrtarisht pranimin e shkeljes së të drejtave të ankuesit nga Misioni dhe të ofrojë korrigjim adekuat për të.
2. Paneli më tej fton Misionin të hetojë, si pjesë e veprimtarisë së tij monitoruese, me prokurorin kompetent nëse çështja po hetohet dhe, nëse jo, pse është ashtu.
3. Paneli fton Misionin të marrë parasysh se cilat hapa konkretë dhe domethënës mund të ndërmarrë Misioni për të kontribuar në ecjen përpara të hetimit të rasteve të zhdukjeve me forcë/personave të zhdukur.

Paneli është i gatshëm të vazhdojë të angazhohet me shefin e Misionit në përpjekjen për të gjetur zgjidhje për atë qëllim. Megjithatë Paneli dëshiron të theksojë se hapat e ndërmarrë deri më tani nga Misioni janë të jo të duhura nga pikëpamja e obligimeve të Misionit ndaj të drejtave të njeriut dhe të paafta për të kontribuar në mënyrë kuptimplote në zgjidhjen e atyre rasteve. Është koha e duhur që Misioni të bëjë më shumë.

4. Paneli fton shefin e Misionit të shqyrtojë me kujdes se cilat mjete juridike adekuate dhe kuptimplota janë në dispozicion të Misionit në një rast siç është rasti i tanishëm ku Misioni është gjetur të ketë shkelur të drejtat e një të afërmi të një personi të zhdukur dhe të informojë Panelin për konkluzionet e tij.
5. Paneli fton Misionin të shpërndajë këtë vendim tek:
  - i. Personeli përkatës brenda Misionit;
  - ii. Zyrtarët përkatës të Bashkimit Evropian që kanë përgjegjësi për Kosovën, rajonin e Ballkanit, çështjet e sundimit të ligjit ose çështjet e të drejtave të njeriut; dhe
  - iii. Autoritetet vendore kompetente.

**Fton** Misionin t'i raportoje Panelit ne lidhje me zbatimin e rekomandimeve te mesiperme sa me shpejt qe eshte e mundur dhe jo me vonë se 30 nëntori 2021.

Për Panelin,

Anna AUTIO  
Kryesuese

Petko PETKOV  
Anëtar

